

**Nappaatit tunillaassortut akiorniarlugit iliuitsit pillugit Inatsisartut inatsisaat***Peqqissutsimut Naalakkersuisumit saqqummiunneqartoq*

pillugu

**Ilaqtariinnermut Peqqissutsimullu Ataatsimiititaliap****siunnersuutit aappassaaneerneqarnerannut****ISUMALIUTISSIISSUTAA**

Ataatsimiititaliaq suliarinninnermini uku ilaasortarai:

Inatsisartunut ilaasortaq Hans Peter Poulsen, Siumut, siulittaasoq  
Inatsisartunut ilaasortaq Anna Wangenheim, Demokraatit, siulittaasup tullia  
Inatsisartunut ilaasortaq Mikivsuk Thomassen, Inuit Ataqatigiit  
Inatsisartunut ilaasortaq Eqaluk Høegh, Inuit Ataqatigiit  
Inatsisartunut ilaasortaq Mala Høy Kuko, Siumut  
Inatsisartunut ilaasortaq Aslak W. Jensen, Siumut  
Inatsisartunut ilaasortaq Emmanuel Nuko, Naleraq

UPA2022-imi marsip 23.-ani siullermeerinerup kingorna siunnersuut ataatsimiititaliap misissorpaa.

**1. Siunnersuutip imarisaa siunertaalu**

Nappaatit tuniluuttut kingusinnerusukkut allannguuteqartartut pillugit inatsisartut peqqussutaanni malittarisassat atuuttut ingerlatiinnarneqarnissaannik, malittarisassanillu nutaanik COVID19-p tunillaassuunnerani misilittagarineqalersimasut tunngavilinnik Inatsisartut inatsisissaattut siunnersuut una imaqarpoq. Inatsisissatut siunnersuut Danmarkimi malittarisassat assigivai. Allanguutaasoq annerpaaq tassaavoq tunillaassortunik nappaalanersuaqarneranut ataatsimiititaliarsuaq inerteqqutinik aalajangersaanissamut piginnaatitaajunnaassammat, piginnaatitaaffilli taanna Naalakkersuisunut nuunneqassalluni. Tunillaassortunik nappaalanersuaqarneranut ataatsimiititaliarsuaq allannguuteqartitsinerup kingorna siunnersuisartutut atuutissaaq. Pingaaruteqarluinnarpoq inatsisip nappaatit tuniluuttut nunatsinnut eqqunneqannginnissat inuiaqatigiinnilu tuniluutinnginnissaat, nappaatinullu tunillaassuuttunut inuiaqatigiit innutaasullu illersorneqarnissaannut iliuseqarnissamut piginnaasaqarnissaq pingaaruteqarluinnarluni.

## **2. Siunnersuutip Inatsisartunit siullermeerneqarnera**

Nappaatinut tunillaassuuttunut innuttaasut inuiaqatigiillu illersorneqarnissaasa qulakkeerneqarnissaanut inatsiseqarnissaa pingaaruteqarnera pillugu siullermeerinninnermi isumaqatigiissutigineqarpoq. Malittarisassat annertuumik sunniuteqartussat aammalu Naalakkersuisut pisinnaatitaaffiisa annertusineqarnissaat eqqartorneqarmata aamma oqaluuserineqarpoq.

## **3. Tusarniaanermi akissuteqaatit**

Tusarniaanermi akissutigineqartut inatsisissatut siunnersuummut kakkiunneqarput, tamanna Inatsisartut Siulittaasoqarfiata ilusiliinissamut piumasaqaataanut naapertuuppoq.

## **4. Siunnersuutip aningaasatigut kingunerisassai**

Siunnersuutip piviusunngortinneqarnerani aningaasatigut kingunerisassai siunnersuummut nalinginnaasumik oqaaseqaatini allaaserineqarput. Tassani, inatsisissap pineqartup malitsigisaanik iliuuseqartoqassappat siunnersuut inuutissarsiortunut aningaasatigut pitsaannngitsumik kinguneqassasoq allassimavoq. Pissutsit arlallit matumani apeqqutaallutik, ilaatigut iliuuserineqartup sakkortussusaa iliuuseqarnissamullu piffissap sivisussusaa eqqarsaatigalugit.

## **5. Inatsisartut Siulittaasoqarfiannit saaffiginnissut**

Naalakkersuisut Siulittaasuannut saaffiginnissutip 4. april 2022-mi ullulerneqartup assileneqarneranik ataatsimiititaliaq ilisimatinneqarpoq. Allakkat assilineri isumaliutissiisummi matumani ilanngussaq 1-itut ilanngunneqarput.

## **6. Apeqqutit**

Ataatsimiititaliap siunnersuummik suliarinninneranut atugassatut Inatsisartutigoortumik nakkutiginnissinnaanermut periarfissat kiisalu tunillaassortunik nappaalanersuaqarneranut ataatsimiititaliarisup atuunnerani allannguutissatut siunnersuutit pillugit apeqqutit akeqqullugit Naalakkersuisut Siulittaasuat ataatsimiititaliamit qinnuigineqarpoq. Ataatsimiititaliap apeqqutai Naalakkersuisullu akissutaat isumaliutissiisummut ilanngussaq 2-tut aamma 3-tut ilanngunneqarput.

## **7. Ataatsimiititaliap siunnersuummik suliarinninnera**

Nappaatit tunillaassuuttut pineqartillugit innuttaasut inuiaqatigiillu illersorneqarnissaasa qulakkeerneqarnissaa pingaaruteqartoq isumaqatigiissutigineqarmat ataatsimiititaliap maluginiarpaa.

### 7.1. Tunillaassortunik nappaalanersuaqarneranut ataatsimiititaliarsuup atuuffia

Politimesteri/Politiit Pisortaat tusarniaanermut akissummini Tunillaassortunik Nappaalanersuaqarneranut Ataatsimiititaliarsuaq siunnersuutikkut ima allanngortinneqartoq oqarmat ataatsimiititaliamit maluginiarneqarpoq: ”*kommissioni arlaannaanulluunniit attuumassuteqarani nammineerluni aalajangiisinnaatinneqarunnaarluni Naalakkersuisunut siunnersuisartunngorpoq, taamaalillutik Naalakkersuisut Tunillaassortunik Nappaalanersuaqarneranut Ataatsimiititaliarsuup aalajangiiffigisarsimasaannik aalajangiisinnaanngorlutik.*” Politimesterip tusarniaanermut akissummi ilanngullugu oqaatigaa taamaaliornikkut naalakkersuinikkut akuliutinnginnissamik tunngavik peerneqartoq. (takuuk inatsimmut nassuiaatini qupperneq 90).

Inatsisissatut siunnersuummik suliarinninnerminut atatillugu tunillaassortunik nappaalanersuaqarneranut ataatsimiititaliarsuup atuuffiani allannguutit nassuiaatigeqqullugit ataatsimiititaliap Naalakkersuisut qinnuigai.

Suliniutissat arlallit taamaallaat tunillaassortunik nappaalanersuaqartillugu ataatsimiititaliarsuarmit aallartinneqarsinnaasut akissummini Naalakkersuisut paasissutissiissutigaa. Taamaalillunilu tunillaassortunik nappaalanersuaqartillugu ataatsimiititaliaq inuinnarnut iliuusissanik peqqussuteqarsinnaavoq, taakkunungaluk nakorsamik misissortinneq, mattunneq, pinngitsaaliissummik unitsitsineq aammalu nunami sumiiffinnik mattussineq ilaatinneqarput. Nappaatit tunillaassortut akiorniarlugit iliuutsit pillugit Inatsisartut inatsisissaattut siunnersuut nutaaq aqqutigalugu oqartussaaffik taanna tunillaassortunik nappaalanersuaqarneranut ataatsimiititaliarsuarmit annaaneqassaaq, tamatumalu kingorna inatsit naapertorlugu malittarisassanik aalajangersaanissaq atorunnaarsitsinissarlunniit pillugu taamaallaat inassuteqarsinnaalissalluni. Taamaalillunilu inatsisissatut siunnersuut maanna ilusimisut iluseqartoq akuerineqassappat inuinnarnut iliuusissanik peqqusisinnaaneq siunissami Naalakkersuisut (Nakorsaaneqarfiup) oqartussaaffigilissavaat.

Tunillaassortunik nappaalanersuaqarneranut ataatsimiititaliarsuup atuuffiata allanngortinneqarnissaanik siunnersuummut tunuliaqutaasoq pillugu Naalakkersuisut akissummini paasissutissiissutigaa Covid-19-imut isumaginninnermut atatillugu ”*Naalakkersuisut nunarsuaq tamakkerlugu tuniluuttoqarnerani ataatsimiititalianik pilersitsisarneq, naalakkersuinikkut suliaqartarnerit, innuttaasut qisuariaataat peqqinnissaqarfinnilu suliasat pillugit misilittagaqalerput. Tassani Naalakkersuisut eqqortumik, sukkasuumik annertoqatigiimmillu iliuuseqarnissamut pisussaaffeqarnerat pingaarutilittut inissisimavoq, tamannalu eqquutsinngippat kingunerisassat Naalakkersuisunit*

*akisussaaffigineqartussaapput. Tamanna peqqutigalugu tunngaviusumik aalajangigassanut aalajangiisinnaanerup Naalakkersuisuniiginnarnissaa pisariaqarpoq, tassanili tunillaassortunik nappaalanersuaqartillugu ataatsimiititaliami ilaasortat, taakkunungalu Nakorsaaneqarfik, Politiit il.il. ilanngullugit piginnaasaqartut ilitersuisorineqassapput.”*

## **7.2. Inatsisartutigoortumik nakkutillineq**

Inatsit naapertorlugu akuliunnerit inatsisartutigoortumik nakkutigineqarnissaanut tunngavinnik nappaatit tunillaassuuttut pillugit inatsimmut ilanngussinissaq Naalakkersuisunit suliniutigineqassasoq Inatsisartut Siulittaasoqarfiata januar 2021-mi Naalakkersuisunut kaammattuutigaa. Tamatumani Siulittaasoqarfimmit oqaatigineqarpoq Covid19-imut atatillugu aalajangiinerit innuttaasunut suliffeqarfinnullu annertuumik sunniuteqarlutillu akulerummata, soorluttaaq aalajangiinermi tunngaviup kingunissallu erseqqissuullutillu paasinaruunissaat pisariaqartinneqartut Siulittaasoqarfimmit tikkuarneqartoq. Kiisalu nappaatit tunillaassuuttut pillugit inatsisissatut siunnersuut nutaaq Danmarkimi suliarineqaleruttortoq Siulittaasoqarfiup innersuussutigaa, tamatumani nappaatit tunillaassuuttut pillugit inatsit naapertorlugu akuliunnerit inatsisartutigoortumik nakkutigineqarnissaat ilaatigut siunertaalluni.

Inatsisissatulli siunnersuut una aalajangersakkanik, nappaatit tunillaassuuttut pillugit inatsit naapertorlugu suliniutit inatsisartutigoortumik nakkutigineqarnissaannik qulakkeerinnittunik, ilaqanngilaq.

Tamatumunnga tunngaviusumut atatillugu Naalakkersuisut ataatsimiititaliamut akissummi paasisutissiissutigaat inatsisartutigoortumik nakkutilliinissaq pillugu aalajangersakkanik, nappaatit tunillaassuuttut pillugit danskit inatsisaanni atuuttumi aalajangersakkat assingannik, ilanngussinissaq imaanngitsoq naapertuuttusoq, tassa Kalaallit Nunaanni Danmarkimilu naalakkersuinikkut suleriaatsit assigiinngimmata. Taamaattumillu nappaatit tunillaassuuttut pillugit inatsimmut allannguutissatut siunnersuummik, danskit assigalugit inatsisartutigoortumik nakkutilliinermik atuutsitsilernermik imaqartumik, saqqummiussinissaq sioqqullugu kingunerisassat nalinginnaasut taamatullu inatsisilerinermut tunngasut tamakkiisumik paasinarsisinneqarnissaat Naalakkersuisunit kissaatigineqarpoq.

Tamanna Ilaqutariinnermut Peqqissutsimullu Ataatsimiititaliap tusaatissatut tiguaa.

”Atorunnaarsitsinissamut aalajangersagaq”-imik taasap Inatsisartut inatsisaata ulloq 1. juli 2023-imi atorunnaarsinneqarnissaanik kinguneqartoq aalajangersaanikkut pineqartup anguniarneqartup siuariartornissaa tapersorsorneqartariaqartoq Ilaqutariinnermut Peqqissutsimullu Ataatsimiititaliamit kissaatiginartinneqarpoq.


Tamatumunnga naapertuuttumik ataatsimiititaliaq allannguutissatut siunnersuummik saqqummiussaqqarpoq (ilanngussaqq 4).

Tamatuma kingorna naatsorsuutigineqqarpoq, nappaatit tunillaassortut akiorniarlugit iliuitsit pillugit kingusinnerpaamik 2023-imi upernaakkut Inatsisartut inatsisissaannik nutaamik Naalakkersuisut siunnersuuteqqassat, taannalu inatsisissatut siunnersuut Inatsisartutigoortumik nakkutilliinissamik qulakkeerisumik – annertooujussuarmik – Inatsisartut inatsisaat pisinnaatitsineranik imaqqarpoq.

#### **8. Ataatsimiititaliaq inassuteqaatai**


- Ataatsimiititaliaq isumaqqatigiittoq allannguutissatut siunnersuummik saqqummiussaqqarpoq.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappasaaniigassanngortippaa.



Hans Peter Poulsen

---



Anna Wangenheim

---


Ateq  
Siulittaasoq



Mikivuk Thomassen


---

Ateq  
Siulittaasup tullia



Eqaq Høegh

---



Mala Høegh Kúko

---



Aslak W. Jensen

---



Emanuel Núko

---

# Ilanngussaq Bilag

1



INATISARTUT

Naalakkersuisut siulittaasuat

[govsec@nanoq.gl](mailto:govsec@nanoq.gl)

Assilinera uunga Peqqissutsimut

Naalakkersuisoq

[pn@nanoq.gl](mailto:pn@nanoq.gl)

Ulloq: 12-05-2022

J.nr.: 01.38.01.02-00340

## Uunga siunnersuummut tunngasoq: Nappaatit tunillaassortut akiorniarlugit iliuitsit pillugit Inatsisartut inatsisaat, imm. 161

Allakkani ulloq 4. april 2022-imi ullulernerqartuni Inatsisartut siulittaasoqarfiata Naalakkersuisut siulittaasuannut nassiuunerqartut assilinerinik Ilaqutariinnermut Peqqissutsimullu Ataatsimiititaliaq allakkat assinginik ilisimatinneqarpoq (takuuk ilanngussaq).

Nappaatit tunillaassuuttut pillugit inatsisip Inatsisartut nakkutilliinissamut periarfissaat ilanngunneqarnissaa pillugu Naalakkersuisut Siulittaasoqarfimmit qinnuigineqarsimasut allakkani atuarneqarsinnaavoq. Taamatut allannguneq tamat oqartussaanerannut aammalu COVID19-imik ajornartoornermi ajornakusoortunik unammillernartunillu aalajangiiniarnerni Inatsisartut peqataatinneqarsinnaanerannut annertuumik kinguneqarsimassagaluarpoq. Taamaattumik immikkoortoq 161-p ataatsimiititaliami suliarineqarneranut atatillugu ataatsimiititaliaq malitseqartitsinissaminik kissaateqarpoq, allakkatigullu ima apeqquteqarumalluni:

- 1) Inatsisissatut siunnersuummi, amerlasuutigut danskit inatsisaat naapertorlugu suliarineqartumi, Inatsisartut nakkutilliinissamut periarfissaat ilanngunneqannginnissaa pillugu aalajangerneq sumik tunngaveqarpa?
- 2) Tunillaassortunik nappaalanersuaqartillugu ataatsimiititaliarsuup atuuffiata allanngortinneqarnera nassuiaatigeqqullugu Naalakkersuisut qinnuigineqarput
- 3) Inatsisartut nakkutilliinissamut periarfissaat ilanngunneqassanngippat Inatsisartut peqataatinneqartarnissaa Naalakkersuisut qanoq qulakkeerniarpaa?

Ilaqutariinnermut Peqqissutsimullu Ataatsimiititaliaq sinnerlugu

Inussiarnersumik inuulluaqqusillunga

Hans Peter Poulsen

Siulittaasoq



Ilanngussaq  
Bilag

**Naalackersuisut  
ASSILINERA: Ilaqutariinnut Peqqissutsimullu Ataatsimiititaliaq**

Ulloq  
J.nr.

4. april 2022  
01.10.09-00035

**Asasara Naalackersuisut Siulittaasut**

Siulittaasoqarfiusimasup 2021-mi januaarimi nappaatit tunillaassortut eqqarsaatigalugit inatsisissami nutaami inatsisartutigoortumik nakkutilliinermik ilanngussisoqarnissaanik saaffiginnissut ilanngunneqartoq Naalackersuisunut nassiuppaat.

Inatsisissatut siunnersuummi nutaami nassiunneqartumi inatsisartutigoortumik nakkutilliisinnaanerup suli ilanngunneqarsimannginnera siulittaasoqarfiup maluginiarppaa. Inatsisissatut siunnersuutip saqqummiunneqartup nappaatit tunillaassortut eqqarsaatigalugit danskit inatsisaat assigeqqissaarpaa, soorlu aamma inatsisip 2021-mi apriliimi Inatsisartuni aallaqqaammut tuaviortumik suliarineqartup danskit inatsisaat assigeqqissaarsimagaa.

Taamaalilluni nappaatit tunillaassortut pillugit nunatsinnut inatsimmi nutaami inatsisartutigoortumik nakkutilliisinnaanissamat periarfissamik ilanngussisoqarnissaa siulittaasoqarfiup aalajangiusimavaa – soorlu inatsisartutigoortumik nakkutilliisinnaanissamat periarfissamik danskit inatsisaanni ilanngussisoqarsimasoq kisiannili inatsisissatut siunnersuummi saqqummiunneqartumi nunatsinnut inatsisinnngortussatut assiliinnarneqarsimasumi ilanngunneqarsimanngitsumik.

Inatsisartut suleriaasianni § 4, imm. 4-mi imm. 6-imilu aalajangersarneqarput:  
"Imm. 4. Inatsisartut Siulittaasoqarfiata Inatsisartut aamma ataatsimiititaliaq sulinerisa piareersaasiorneqarnerisa ingerlanneqarnerisalu pissusissaq eqqorlugu ingerlanneqartarnissaat isumagisassavaa.

.....

Imm. 6. Inatsisartut Siulittaasoqarfiata suliassat Suleriaatsimi aalajangersakkat naapertorlugit Siulittaasoqarfimmu saqqummiussat suliarisassavai. Siulittaasoqarfiup suliassat suugaluartullunniit Inatsisartunut Inatsisartunullu ilaasortanut tunngaviumik pingaaruteqartut suliarisinnaavai."





INATSIARTUT  
SIULITTAASUAT

Taamaalilluni ataatsimiititaliani sulinermut atagassarititaasut qularnaarneqarnissaannut siulittaasoqarfik akisussaasuvoq apeqqutillu tunngaviusumik pingaarutillit suliarisinnaallugit. Nappaatit tunillaassortut pillugit inatsimmi nutaami Naalakkersuisut inatsisartutigoortumik nakkutigineqarnissaannut periarfissaqannginneq taamaalilluni apeqqutit tunngaviusumik pingaarutillit pissuseqarsorinarpoq.

Siulittaasoqarfiusimasup 2021-mi allagai tunngavilersuutaalu ilanngunneqartut innersuussutigalugit Naalakkersuisut qinnuigaakka suliassaq suli misissorneqaqqullugu, soorlu aamma suliassaq pillugu ilaqutariinnermut ataatsimiititaliaq ilisimatinneqarumaartoq.

Inatsisartutigoortumik nakkutilliineq eqqarsaatigalugu danskit inatsisaanni Kapitali 4-p assiliner aamma ilannguppara, taanna Kalaallit Nunaanni pineqartoq pillugu inatsimmi nutaami taamaaqataanik naleqqussakkamilli suliniuteqarnissamut tunngaviusinnaammat. Taamatuttaaq danskit inatsisaanni inatsisartutigoortumik nakkutilliinerup ilanngunneqarnissaanut naalakkersuinikkut tunngaviusimasut taamatuttaaq inatsisissatut siunnersuummut Inatsisartunut saqqummiunneqartumut tunngaviusut assilineri ilannguppakka.

Inussiarnersumik inuulluaqqusillunga

  
Hans Eriksen



## Naalackersuisut

Ulloq 25. januar 2021  
J.nr. 01.10.09-00030

### Asasara Naalackersuisut Siulittaasuat

Nappaatit tunillaassortut akiorniarlugit iliuitsit pillugit Inatsisartut peqqussutaata allanngortinneqarnera pillugu inatsimmi - Inatsisartut nukingiusamik aggersarneqarlutik ulloq 1. april 2020-mi akuersissutigisaanni – allassimavoq, inatsit taanna 2021-p naanerani atorunnaartussaasoq inatsisissatullu siunnersuummik nutaamik UKA21-mi saqqummiussisoqassasoq.

Tamanna tunngavigalugu kiisalu – inatsisip taassuma 2020-mi atuuffiani kiisalu 2021-mi suli atuuffiani Inatsisartunit misilittagarpassuulersut tunngavigalugit – suliap naalackersuinikkut malitseqartinneqarnissaata pisariaqarnera Siulittaasoqarfimmit oqallisigineqarpoq.

Taamaammat Naalackersuisut tunngavinnik nutaanik ilanngusseqqullugit Siulittaasoqarfimmit qinnuigineqarput

- Inatsisartutigut nakkutillisoqarsinnaaneranut periarfissamik, soorluttaaq
- Tunillaassortumik Nappaalanersuaqarneranut Ataatsimiititaliarsuup atuuffiinik inatsimmi

nutaassami naleqqussaasoqartariaqartoq.

Taamaalilluni nukingiusamik inatsisiliaq Inatsisartunit april 2020-mi akuersissutigineqartoq danskit inatsisaat nr. 208, 17. Marts 2020-meersoq toqqaannartumik tunngavigalugu sularineqarsimasoq Siulittaasoqarfimmit maluginiarneqarpoq.

Taamaalilluni Siulittaasoqarfimmit aamma maluginiarneqarpoq Danmarkimi maannakkorpiaq nappaatit tunillaassortut pillugit inatsisissatut siunnersuummik nutaamik suliaqartoqartoq, tamatumani inatsisartutigut nakkutilliisinnaanermik ilanngussisoqarluni soorluttaaq Tunillaassortumik Nappaalanersuaqarneranut Ataatsimiititaliarsuup atuuffiinik allannguisoqartoq.

Covid-19-ip ajornartoortitsinerani aalajangiinernut ajornartorujussuarnut kiisalu aalajangiinernut innuttaasut suliffeqarfiillu periarfissaannut toqqaannartumik annertoorujussuarnik sunniuteqartunut Inatsisartut akuutinneqartariaqarnerat, taamaammallu Inatsisartut suliamik tamatuminnga ingerlatsinermut toqqaannartumik



INATSISARTUT  
SIULITTAASUAT

nakkutilliisinnaanerisa pisariaqarnera Siulittaasoqarfimmit sivitsortumik  
suaartaatigineqarsimavoq.

Suliamik ingerlatsinermut taassumunnga peqataanissaq Siulittaasoqarfimmit  
qilanaarinearpoq nappaatillu tunillaassortut pillugit inatsimmik nutaassamik  
suliaqarnermik piaarnerpaamik aallartitseqqullugit Naalakkersuisut qinnuigineqarlutik,  
taamaalilluta tunillaassorneq pillugu aalajangiinerit kingunissaallu pillugit  
ataatsimoorussilluta ersarissaasinnaaqulluta paasiuminarsaasinnaaqullutalu.

Inussiarnersumik inuulluaqqusillunga

Vivian Motzfeldt

Inatsisartut Nutserisoqarfianit nutsigaaq  
Nassiussisumit akuerineqanngilaq  
Ataatsimiititaliami taamaallaat atugassiaq

Folketingimi partiit akornanni isumaqatigiissuteqarnermi tunngaviit, nappaatit tunillaassortut pillugit danskit inatsisaannut ilanngunneqartussat, uku allassimapput:

- Inatsit malillugu pisinnaatitsissutit atuutsinneqarnerisa inatsisartunit nakkutigineqarnissaat aammalu aalajangiinissami tunngaviit ammasuunissaat nappaatit tunillaassortut pillugit inatsimmi atuuttumi naammattumik qulakkeerineqanngitsoq partiinit isumaqatigiissutigineqarpoq.
- Piginnaatitsissutit aalajangersakkat akuliunnerusut atorineqarnerannik inatsisartutigoortumik nakkutilliineq aammalu taakku naapertorlugit ministerimit pineqartumit nalunaarusiarineqartunut suliatigut tunngaviit ammasuunissaat atuutsinneqalissasut partiit isumaqatigiissutigaa.
- Aalajangersakkanik matuma kinguliani allassimasunik aalajangersaanissamut ministerimit piginnaatitsissutit atuutsinneqalernissaat sioqqullugu taakku folketingimi ataatsimiititaliamut saqqummiunneqartarnissaannik piunasaqaammik atuutsitsisoqalissaaq.
- Ataatsimiititaliap nakkutigisassaa tassaassaaq ataatsimiititaliami amerlanerussuteqartut akerliuppata ministerip maleruagassanik atuutsitsilersinnaannginnissaa. Taamaalillutillu pisuni taakkunani ataatsimiititaliamit amerlanerussuteqartut itigartitsisinnaatitaassapput. Ministerili maleruagassanik, ataatsimiititaliamut siusinnerusukkut saqqummiunneqarsimasunik, atorunnaarsitsisinnaassaaq, qasukkaallatsitsisinnaassaaq aammalu annertunngitsunik (assersuutigalugu erseqqissaataasunik) allanngortitsisinnaassaaq. Allatut oqaatigalugu assersuutigalugu nappaatit tunillaassortut pillugit inatsimmi maleruagassat malillugit pisariaqartumik inatsisitigut tunngavissaaruttoq naliliinermigut ministeri maleruagassanik qasukkaallatsitsisinnaavoq atorunnaarsitsivissinnaalluniluunniit. Maleruagassalli pineqartut atuutsinneqarnissaannik tunillaassortunik nappaalanersuaqarnernut ataatsimiititaliarsuaq inassuteqarsimappat ataatsimiititaliaq ilisimatinneqassaaq.
- Pisuni immikkut ittunik nukinginnartuni innuttaasut peqqissusiat annertuumik tassanngaannartumilluunniit ulorianartorsiortinneqartillugu periusissiamik atuutsitsisoqalissaaq. Pisuni taamaattuni ataatsimiititaliamut siumoortumik saqqummiussinertaqanngitsunik maleruagassiortoqarsinnaavoq. Taamaattoqarsinnaavoq nioqqutissanik inuiaqatigiit ingerlanneqarnerannut pingaarutilinnik (assersuutigalugu nakorsaataarniarfinit nakorsaatinik) amerlasoorsuanngorlugit pisiortortoqarnerani imaluunniit assersuutigalugu saassussisoqarneratigut tassanngaannartumik pisoqarnerani Danmarkimut tunillaassuuttumik eqqussisoqarnerani. Taamaattoqarnerani naalakkersuisut pisariaqanngitsunik kinguarsaanertaqanngitsunik suliassaaq ataatsimiititaliamut

saqqummiutissavaat, tassungalu ilanngullugu nassuiaatigalugu maleruagassanik atuutsitsilerneq saqqummiussinissaq utaqeqqaarnagu pisariaqarsimanersoq. Atuutsitsilernerup kingorna saqqummiussinermi maleruagassat ataatsimiititaliamut ilaasortanit amerlanerussuteqartunit akerlerineqarpata, taakku ministerip atorunnaarsissavai.

- Nakkutilliineq ataatsimiititaliamik ataavartumik nutaamik 21-nik ilaasortaqaartumik pilersitsinikkut ingerlanneqartariaqartoq isumaqatigiissutigineqarpoq.
- Inatsisartutigoortumik nakkutilliinermik aqqissuussinerup immikkut ittuq ilaatut saqqummiussinernik ilisimatitsinernillu ataatsimiititaliap oqaluuserinninnerisa aalajangersimasumik ilusiligaanngitsunik aammalu inimi iliuusissat qanoq ittut ingerlanneqartariaqarnerannik isertuussilluni oqaluuserineqarsinnaaffianni ingerlanneqarsinnaanissaasa qulakkeerneqarnissaat isumaqatigiissutigineqarpoq. Taamaattumillu Folketingip suleriaasiani maleruagassat naapertorlugit saqqummiussisutit ilisimatitsissutillu ataatsimiititaliap matoqqasumik ataatsimiinnerani pisariaqartut isumaqatigiissutigineqarpoq. Inatsisartutigoortumik nakkutilliinermik immikkut ittumik aqqissuussinerup atuutilersinneqarnissaata ilaatut suleriaatsimi allannguutissat pisariaqartut ingerlanneqarnissaat aamma isumaqatigiissutigineqarpoq.

Isumaqatigiinniarnermi qulequtarineqartut isumaqatigiinniarnerrillu inernerisa il.il. allattaavimmut allatorneqarnissaannik Folketingip suleriaasiani maleruagassat nalinginnaasut ataatsimiititaliamut atuutissapput.

*Tunillaassortunik nappaalanersuaqarnernut ataatsimiititaliarsuup atuuffianik katitigaaneranillu allanngineq*

- Maleruagassanik atuutsitsilinnginnermi - ministerip pineqartup qinnuteqarneratigut namminerluunniit sulissutiginninnikkut - tunillaassortunik nappaalanersuaqarnernut nuna tamakkerlugu ataatsimiititaliarsuarmik inassuteqaateqartartussamik pilersitsisoqassaaq. Kiisalu Folketingip ataatsimiititaliaata siuliani taaneqartup ataatsimiititaliarsuup inassuteqarnissaanik qinnuteqaatai ministerimit pineqartumit nalinginnaasumik malinneqartarnissaat naatsorsuutigineqarpoq.
- Inatsisartutigoortumik nakkutilliinerup ilaatut ministeri maleruagassanik folketingip ataatsimiititaliaanut saqqummiussigaangami maleruagassat pillugit ataatsimiititaliarsuup inassuteqaatai ilanngullugit paasissutissiissutigisassavai.
- Ataatsimiititaliarsuup inassuteqaataa pituttuisuussanngilaq, taamaalillunilu folketingip ataatsimiititaliaa akerliulluni oqaaseqarsimanngippat ministeri pineqartoq inassuteqaatinik akerlerinnissinnaallunilu maleruagassanik atuutsitsilersinnaavoq. Taamaaliornikkut aalajangiinerit naalakkersuinikkut aalajangiinerusut atorfilittanit aalajangerneqartamnginnissaat qulakkeerneqassaaq.
- Tamatuma saniatigut piginnaatitsissutit siuliani taaneqartut atorneqarnissaat ataatsimiititaliarsuarmik inassutigineqaraluartoq taanna malinneqassanngitsoq ministeri

aalajangerpat folketingip ataatsimiititaliaanut ilisimatitsisoqarnissaanik piunasaqaammik ilanngussisoqassaaq.

- Kiisalu inatsisartutigoortumik nakkutilliinerup ilaatut folketingip ataatsimiititaliaanut saqqummiussisoqarsimappat imaluunniit ilisimatitsissuteqartoqarsimappat tunillaassortumik nappaalanersuaqarnernut ataatsimiititaliarsuup inassuteqaataasa tamanut saqqummiunneqarnissaannik pisussaaffimmik ilanngussisoqassaaq.

Immikkut ilisimasallit arlaannaannulluunniit attuumassuteqanngitsut ataatsimiititaliap ataatsimiinnerini peqataasinnaanerat inatsimmi toqqaannartumik aalajangersarneqassaaq.

*(Isumaqatigiissut partit akornanni ulloq 18. december 2020-mi isumaqatigiissutigineqarpoq aammalu nappaatit tunillaassortut pillugit inatsisissaq nutaaq folketingimit ulloq 19. januar 2021 suliarineqassaaq.)*

#### Kapitali 4

##### *Piginnaatitsilluni aalajangersakkat atorneqarnerannik inatsisartutigoortumik nakkutiginninneq*

§ 9. Ministeri pineqartoq taamaallaat § 2, imm. 6, oqaaseqatigiit siulliit, § 3, imm. 2 aamma 3, § 24, imm. 1, §§-it 28, 30, 32, 34-37 aamma 40, § 49, imm. 4 aamma 5, § 53, § 55, imm. 1 aamma 2 aamma §§-it 56-58 malillugit malittarisassanik aalajangersaasinnaavoq tamanna sioqqullugu malittarisassat imarisaat Tunillaassortunik nappaalanersuaqarneranut ataatsimiititaliarsuup inassuteqaataanik ilaqartillugit ataatsimiititaliamut Folketingimit pilersinneqarsimasumut saqqummiunneqarsimappata malittarisassallu atuutsinneqalernissaannut ataatsimiititaliaq oqaaseqaateqarsimangippat, taamaattorli imm. 2. takujuk. Oqaaseqatigiinni siullerni malittarisassanik aalajangersareerineqarsimasunik atuukkunnaarsitsinerit, qasukkaanerit allannguinerillu pingaaruteqanngitsut ilaatinneqanngillat.

*Imm. 2.* Innuttaasut peqqissusiat massakkorpiaq pinartumillu arlerinartorsiortinneqarpat ulorianartorsiortinneqarluniluunniit ministeri pineqartoq malittarisassanik atuutilersitsisinnaavoq imm. 1 malillugu ataatsimiititaliamut saqqummiusseqqaanngikkaluarluni. Taamaattoqarpat ministerip malittarisassanik atuutilersitsinerup kingorna pisariaqanngitsumik kinguarsaanani taakku ataatsimiititaliamut saqqummiutissavai. Malittarisassat akerleralugit ataatsimiititaliaq oqaaseqaateqarpat ministerip malittarisassat atuukkunnaarsissavai.

*Imm. 3.* Ministeri pineqartoq kingusinnerpaamik qaqugu ataatsimiititaliap akerliulluni oqaaseqaateqarsinnaaneranut akuerineqarsinnaasumik piffissaliisinnaavoq.

§ 10. Tunillaassortunik nappaalanersuaqarneranut ataatsimiititaliarsuup nammineq piunassutsiminik qinnuigineqarnermigulluunniit § 2, imm. 6, oqaaseqatigiit siulliit, § 3, imm. 2 aamma 3, § 24, imm. 1, §§-it 28, 30, 32, 34-37 aamma 40, § 49, imm. 4 aamma 5, § 53, § 55, imm. 1 aamma 2, aamma §§-it 56-58 malillugit malittarisassioortoqarnissaa, imaluunniit malittarisassat aalajangersakkat taakku malillugit aalajangersarneqarsimasut atuukkunnaarsinneqarnissaat sakkukillineqarnissaalluunniit inassutigippagu ministerillu pineqartup inassuteqaat malinnianngippagu, ministerip piaarnerpaamik ataatsimiititaliarsuup inassuteqaataa aamma ministerip malinninniannginnera pillugit ataatsimiititaliaq Folketingimit pilersinneqarsimasoq ilisimatissavaa. Malittarisassanik aalajangersarneqareersimasunik allannguinerit pingaaruteqanngitsut oqaaseqatigiinnut siullernut ilaatinneqanngillat.

§ 11. Ministerip pineqartup § 2, imm. 6, oqaaseqatigiit siulliit, § 3, imm. 2 aamma 3, § 24, imm. 1, §§-it 28, 30, 32, 34-37 aamma 40, § 49, imm. 4 aamma 5, § 53, § 55, imm. 1 aamma 2, aamma §§-it 56-58 malillugit malittarisassioortoqartariaqarneranik Tunillaassortunik nappaalanersuaqarneranut ataatsimiititaliarsuup inassuteqaatai tamanut saqqummiuttassavai. §§-it 9 aamma 10 malillugit ataatsimiititaliaq Folketingimit pilersinneqarsimasoq saqqummiussivigineqassappat ilisimatinneqassappalluunniit inassuteqaat saqqummiussinerup ilisimatitsinerulluunniit kingorna piaarnerpaamik tamanut saqqummiunneqassaaq.

Inatsimmut nassuiaatinut aallamiummi atuarneqarsinnaavoq:

”Inatsisartutigoortumik nakkutilliinerup nukittorsarneqarnissaa aamma naalackersuisunut aalajangiisuvoq. Taamaattumik Naalackersuisut siunnersuutigaat piginnaatitsilluni aalajangersakkat periarfissanik pisinnaatitaaffinnillu killiliisut atorneqarnerannik inatsisartutigoortumik nakkutilliinermik aamma nalunaarutinut ministerip pineqartup atuutilersitaanut suliatigut tunngavigisat ammasumik ingerlanneqarnissaannut immikkut aaqqissuussinermik eqqussisoqassasoq. Tamanna pissaq tunillaassortunik nappaalanersuaqarnera pillugu inatsimmi malittarisassiorsinnaanermut ministerimut piginnaatitsissutit assigiinngitsut timitalerneqarnissaat sioqqullugu taakku folketingip ataatsimiititaliaanut saqqummiunneqartarnissaannik piumasaqaateqalernikkut. Ataatsimiititaliap nakkutilliisutut inissisimanera ima ingerlanneqassaaq ministeri malittarisassanik atuutilersitsisinnaanani ataatsimiititaliami amerlanerussuteqartut akerliuppata. Tamatumunnga atatillugu Tunillaassortunik nappaalanersuaqarneranut ataatsimiititaliarsuarmik, ilaatigut malittarisassanik inatsisartutigoortumik nakkutilliinermut siunnersuutigineqartumut ilaatinneqartunik atuutilersitsisoqarsinnaalinnginnerani ministerimit pineqartumit qinnuigineqarnikkut namminerluunniit piumassutsimik inassuteqaateqartartussamik pilersitsisoqarnissaa aamma siunnersuutigineqarpoq.

Ingerlaavartumik naalackersuinikkut nakkutilliisinnaanissaq eqqarsaatigalugu nalunaarutit tamarmik inatsisartutigoortumik nakkutilliinermut ilaatinneqartut qaqugukkut atuukkunnaarnissaannik aalajangersakkamik ilaqartinneqartarnissaannik piumasaqaateqartoqalissasoq siunnersuutigineqarpoq.

Kiisalu siunnersuutigineqarpoq ilaatigut pilersuiniarnikkut ajornartoornerni nakorsaatissaqarniarnikkut upalungaarsimanerup nukittorsarneqarnissaa pillugu nakorsaatit pillugit inatsimmi allanngortitsisoqassasoq, taamatullu aamma peqqinnissaq pillugu inatsimmi allanngortitsisoqassasoq ilaatigut pisariaqartitsinermik sippuinermi pisuni immikkut ittuni nunanut allanut ikiorsiisinnaanissaq siunertaralugu peqqinnissamut tunngatillugu atortunik, sulisunik il.il. tunniussaqaarnissamut piffissamulluunniit killilikkamut atukkiisinnaanissamut nunap immikkoortuisa kommunillu oqartussanik suliniaqatigiiffinnillu isumaqatigiissuteqartarsinnaanissaannut tunngavissiiinissaq siunertaralugu.”



### *2.2.2.3. Folketingip ataatsimiititaliaa*

Inatsisartutigoortumik nakkutilliinerup ataatsimiititaliamit Folketingimit pilersinneqartumit ingerlanneqarnissaa siunnersuutigineqarpoq. Taamaalilluni ataatsimiititaliamik pilersitsinissaq Folketingip aalajangiassarissavaa.

Qulequtarpasuit piginnaatitsissutitut aalajangersakkat inatsisartutigoortumik nakkutilliinerup ilaatinneqartut siammasinnerujussuisa malitsigisaanik ataatsimiititaliap peqqissutsimut tunngatillugu naalakkersuinikkut ingerlatsineq kisiat pinnagu, kisiannili aamma qulequttat inuussutissarsiornermut, eqqartuussiveqarnermut, angallannermut, atuartitaanermut, kulturimut ilinniartitaanermullu tunngatillugu naalakkersuinikkut ingerlatsinerup tunngasut oqaluuserisartussaassavai. Inatsisartutigoortumik nakkutilliinerup ataatsimiititaliamut ataatsimut arlalinnuunngitsoq pituttorsimanissaa pissusissamisoormerpaatut isigineqarpoq. Tamatumunnga pissutaavoq taamatut pituttuineq nappaatit inunnu nalinginnaasumik ulorianartut nappaatillu inuiaqatigiinnut aarlerinartorsiortitsisut ataqatigiissumik ataqatigiissaakkaamillu suliarineqartarnissaannut peqataasinnaammat. Taamaattumik suliassaq ataatsimiititaliami nutaami inissinneqarnissaa naatsorsuutigineqarpoq.

Ataatsimiititaliap ataavartuunissaa taamatuttaaq naatsorsuutigineqarpoq, taamaalilluni malittarisassanik inatsisartutigoortumik nakkutilliinerup ilaasunik atuutilersitsisoqartariaqalissappat ataatsimiititaliap ingerlaavartumik piareersimasinnaaqullugu taamatullu aamma apeqqutit nappaatit nalinginnaasumik ulorianartut nappaatillu inuiaqatigiinnut aarlerinartorsiortitsisut suliarineqarnerannut tunngasut ataatsimiititaliami ingerlaavartumik eqqartorneqartarsinnaaniassammata.

Inatsisissatut siunnersuut akuersissutigineqarpat Folketingip suleriaasiani allanngortitsinerit pisariaqartut Folketingip ingerlatissagai naatsorsuutigineqarpoq.



Familie- og Sundhedsudvalget  
CC Formandskabet for Inatsisartut

Ilanngussaq  
Bilag  
2 + 3

**Uunga siunnersuummut tunngasoq: Nappaatit tunillaassortut akiorniarlugit  
iliuutsit pillugit Inatsisartut inatsisaat, imm. 161**

23-05-2022  
Sags nr.  
Akt nr. 20180360

Matumuuna 2022-mi upernaakkut ataatsimiinnermi imm. 161 pillugu Ilaqutariinnermut Peqqissutsimullu Ataatsimiititaliap saaffiginnissutaa, 12. maaji 2022-meersoq akissuteqarfigissavara.

Postboks 1160  
Tlf: 34 50 00  
Fax: 34 55 05  
3900 Nuuk  
Email: [pn@nanooq.gl](mailto:pn@nanooq.gl)  
[www.naalakkersuisut.gl](http://www.naalakkersuisut.gl)

**1. Inatsisissatut siunnersuummi, amerlasuutigut danskit inatsisaat naapertorlugu suliarineqartumi, Inatsisartut nakkutilliinissamut periarfissaat ilanngunneqannginnissaa pillugu aalajangerneq sumik tunngaveqarpa?**

Aallarniutigalugu erseqqissaatigissavara, 12. maaji 2022-mi Inatsisartut Siulittaasoqarfiannut allakkiamik nassiussigama, tassanilu nappaatit tunillaassortut akiorniarlugit iliuutsit pillugit inatsimmut (matuma kingorna tuniluuttoqarneranut inatsit) naalakkersuinikkut nakkutilliinerit pillugit aalajangersakkanik ilanngussisoqarnissaa suli kissaatigineqarnerasoq apeqqutigaara. Akissut 19. maaji 2022-mi tiguara, tassanilu Inatsisartut Siulittaasuannit uppersarneqarpoq, naalakkersuinikkut nakkutilliinerit pillugit aalajangersakkanik ilanngussisoqarnissaa suli kissaatigineqartoq.

Tuniluuttoqarneranut inatsisip imaa aamma danskit inatsisaat arlalitsigut assigiissuteqartut ilumoorpoq, kisiannili naalakkersuinikkut nakkutilliinerit pillugit aalajangersakkat pisuni tamani ilanngutissallugit naapertuuttuusariaqanngilaq, Kalaalit Nunaanni Danmarkimilu naalakkersuinikkut sullisseriaatsit assigiinngimmata. Tassani inatsisitigut suliassatigullu kingunerisassat tamakkiisumik paasineqarsimanissaat kissaatigaara, taamaalilluni Naalakkersuisut Inatsisartullu inatsimmut allannguutissamut taamaattumut aalajangiissagunik iluaqutissanik ajoqutissanillu ilisimasaqalersinnaassammata. Allannguutissanik siunnersuuteqarnermi aalajangersakkanik, danskit aalajangersagaannut assingusunik ilanngussinermi kingunerisinnaasat misissuiffigineqarnissaat qulakkiissavara, taamaalilluni

allannguutissatut siunnersuut naapertuuttoq Naalakkersuisuni  
aalajangiiffigineqareernermini erngerluni Inatsisartunut saqqummiussinissaq  
siunertaralugu saqqummiunneqarsinnaassammat.

Allannguutissamik siunnersuuteqarnerup kingunerisaanik naalakkersuinikkut  
nakkutilliinerit pillugit aalajangersakkat sunniutissaat naammassisinnaaniarlugit  
Inatsisartuni Naalakkersuisunilu isumalluutit ilaneqarnissaasa pisariaqartinneqarnissaa  
naatsorsuutigineqartariaqarpoq. Taakku annertussusissaat maannarpiaq suli  
misissuiffigineqarsimanngillat.

## **2. Tunillaassortunik nappaalanersuaqartillugu ataatsimiititaliarsuup atuuffiata allanngortinneqarnera nassuiaatigeqqullugu Naalakkersuisut qinnuigineqarput**

Tuniluuttoqarneranut inatsisissatut sunnersuummi tunillaassortunik  
nappaalanersuaqartillugu ataatsimiititaliarsuup atuuffianut allanngineq annernut  
ilaavoq, tassanilu tunillaassortunik nappaalanersuaqartillugu ataatsimiititaliap  
Naalakkersuisunut siunnersuisuusarnissaa pineqarpoq. Inatsit maanna atuuttoq  
naapertorlugu suliniutissat arlallit, taamaallaat tunillaassortunik  
nappaalanersuaqartillugu ataatsimiititaliamit aallartinneqarsinnaapput.  
Aalajangersimalluinnartumik oqaatigalugu maleruagassiat maanna atuuttut  
naapertorlugit tunillaassortunik nappaalanersuaqartillugu ataatsimiititaliaq inuinnarnut  
iliuusissanik peqqussuteqarsinnaavoq, taakkunungalu nakorsamit misissortinneq,  
mattunneq, pinngitsaaliissummik unitsitsineq aammalu nunami sumiiffinnik  
mattussineq ilaatinneqarput. Tuniluuttoqarneranut inatsit nutaaq naapertorlugu  
taamaallaat tunillaassortunik nappaalanersuaqartillugu ataatsimiititaliaq, nappaatit  
inuiaqatigiinnut nalinginnaasumik ulorianaatillit siaruanginnissaat qulakkeerniarlugu  
tuniluuttoqarneranut inatsit tunngavigalugu maleruagassanik aalajangersaanissamut  
atorunnaarsitsinissamullu *inassuteqarsinnaavoq*. Tassalu aalajangiinissamut  
oqartussaaffik Naalakkersuisuniittussaavoq, tunillaassortunik nappaalanersuaqartillugu  
ataatsimiititaliamiinnani.

Covid-19-imut tunngatillugu isumaginninnermut atatillugu Naalakkersuisut nunarsuaq  
tamakkerlugu tuniluuttoqarnerani ataatsimiititalianik pilersitsisarneq,  
naalakkersuinikkut suliaqartarnerit, innuttaasut qisuariaataat peqqinnissaqarfimmilu  
suliassat pillugit misilittagaqalerput. Tassani Naalakkersuisut eqqortumik, sukkasuumik


annertoqatigiimillu iliuseqarnissamut pisussaaffeqarnerat pingaarutilittut inissisimavoq, tamannalu eqquutinngippat kingunerisassat Naalakkersuisunit akisussaaffigineqartussaapput. Tamanna pequtigalugu tunngaviumik aalajangigassanut aalangiisinnaanerup Naalakkersuisuniiginnarnissaa pisariaqarpoq, tassanili tunillaassortunik nappaalanersuaqartillugu ataatsimiitaliami ilaasortat, taakkunungalu Nakorsaaneqarfik, Politiit il.il. ilanngullugit, piginnaasaqartut ilitsersuisorineqassapput.

### **3. Inatsisartut nakkutilliinissamut periarfissaat ilanngunneqassanngippat Inatsisartut peqataatinneqartarnissaat Naalakkersuisut qanoq qulakkeerniarpa?**

Soorunami aalangiiffigisassani pingaarutilinni Inatsisartut peqataatinneqarnissaat Naalakkersuisunit ersarissumik soqutigisarineqarpoq, pingaartumik aalangiiffigisassat atituunik tunngaveqaraangata, tassanilu inuiaqatigiit peqqissutsikkut ajornartorsiorsinnaagaangata. Taamaattumik naalakkersuinikkut nakkutilliinissamut aalajangersagaasinnaasut apeqqutaatinnagit Inatsisartut akuutinneqarnissaat ingerlaavartumik naliliiffigineqartartussaapput.

Taamatuttaaq Naalakkersuisut Covid-19 tunngatillugu isumaginninnermut atatillugu partiinik akuutitsisarnermi misilittagaqarlualerput, ilaatigut Inatsiseqarnermut Ataatsimiitaliap XM2020/18-imut isumaliutissiisutaata kingunerisaanik. Taamaattumik ataatsimiitaliaq tuniluuttoqarneranut inatsimmut maannatut iluseqartumut assingusunik inassuteqassappat, tamanna aamma inatsisip siunissami atorineqarnissaanut eqqarsaatigineqartussaavoq.

Inussiarnersumik inuulluaqqusillunga



Mimi Karlsen

Peqqissutsimut Naalakkersuisoq

Allannguutissatut siunnersuut

uunga

**Uunga siunnersuut: Nappaatit tunillaassortut akiorniarlugit iliuitsit pillugit  
Inatsisartut inatsisaat**

Aappassaaneerinninnermut Ilaqutariinnermut Peqqissutsimullu Ataatsimiititaliamut saqqummiunneqartoq.

Kapitali 12-imut

1. Kapitali 12 ima oqaasertaqassaaq:

**” Kapitali 12**

*Atuutilersitsinermut atuukkunnaarsitsinermullu aalajangersakkat*

§ 57. Inatsisartut inatsisaat ulloq 1. juli 2022 atuutilissaaq.

*Imm. 2. Inatsisartut inatsisaat ulloq 1. juli 2023 atuukkunnaarsinneqassaaq.”*

Siunnersuummut nassuiaatit

**Nalinginnaasumik nassuiaatit**

Inatsisartut Siulittaasoqarfiata 2021-mi januaarimi Naalakkersuisunut kaammattuutigaa nappaatit tunillaassoortut pillugit inatsimmi inatsit malillugu killiliilluni iliuitsinik inatsisartutigoortumik nakkutilliisinnaanermut najoqqutassanik nappaatit tunillaassortut pillugit inatsimmi ilanngussisoqarnissaanut suliniuteqaqqullugit. Tamatumunnga atatillugu Siulittaasoqarfiup oqaatigaa Covid-19 eqqarsaatigalugu pissutsinut tunngatillugu aalangiisarnerit innuttaasunut suliffeqarfinnullu annertuumik akulerunnerummata, soorlu aamma aalajangiinissamut tunngavigisanut kingunerisassanullu tunngatillugu erseqqissunik paasinartunillu aalajangiisoqartarnissaata pisariaqassusia Siulittaasoqarfiup uparuaraa. Tamatuma saniatigut Siulittaasoqarfiup innersuussutigaa taamanikkut nappaatit tunillaassortut pillugit inatsisissatut siunnersuut nutaaq Danmarkimi suliarineqaleruttormat ilaatigut nappaatit tunillaassortut pillugit inatsit malillugu akulerunnerit inatsisartutigoortumik nakkutigineqarsinnaanerisa qularnaarneqarnissaat siunertaralugu.

Inatsisissatulli siunnersuut Naalackersuisunit saqqummiunneqartoq aalajangersakkanik imaqanngilaq nappaatit tunillaassortut pillugit inatsit malillugu iliuutsinik inatsisartutigoortumik nakkutilliisinaanissamik qularnaarinnittunik.

Tamatumunnga tunngaviusut qulaajarneqarnissaannut Naalackersuisut Ilaqutariinnermut Peqqissutsimullu Ataatsimiititaliamut akissummi paasissutissiissutigisimavaat inatsisartutigoortumik nakkutilliisinaanermut aalajangersakkanik Danmarkimi nappaatit tunillaassortut pillugit inatsimmi atuuttumi aalajangersakkanut naapertuuttunik ilanngussinissaq isumaqanngitsoq tamanna tamatigut pissusissamisuussasoq, tassamigooq Kalaallit Nunaanni Danmarkimilu naalackersuinikkut aqutseriaatsit assigiinngimmata. Naalackersuisut taamaattumik tamatuma ulluinnarni sulinnermut inatsisilerinikkullu kingunerisassaasa tamakkiisumik qulaajarneqarnissaat kissaatigaat Danmarkimi inatsimmut naapertuuttumik inatsisartutigoortumik nakkutilleeriaatsimut naapertuuttumik nappaatit tunillaassortut inatsisip allanngortinneqarnissaanik siunnersuuteqannginnermi.

Ilaqutariinnermut Peqqissutsimullu Ataatsimiititaliap suliniutit tamakku siumut ingerlanissaat ikorfartorniarlugu kissaatiginartissimavaa siunnersuummi saqqummiunneqartumi atorunnaarsitsinissamut piumasaqaammik aalajangersaasoqassasoq Inatsisartut inatsisaata ulloq 1. juli 2023 atuukkunnarsinneqarnissaanik malitseqartussamik.

Taamaalillugu naatsorsuutigineqarpoq Naalackersuisut nappaatit tunillaassortut akiorniarlugit iliuutsit pillugit Inatsisartut inatsisissaannik nutaamik kingusinnerpaamik 2023-mi upernaakkut ataatsimiinnermut saqqummiussissasut, inatsisissatullu siunnersuut taanna aalajangersakkanik imaqassasoq Inatsisartut inatsisaat tunngavigalugu iliuusaasinnaasut – annertuumik akulerunnerusinnaasut – inatsisartutigoortumik nakkutigineqarsinnaanerinek qularnaarittumik.

Inatsisissatut siunnersuummut tunngatillugu Ilaqutariinnermut Peqqissutsimullu Ataatsimiititaliap isumaliutissiissutaa allatigut innersuussutigineqarpoq.

### **Allannguutissatut siunnersuummi aalajangersakkanut ataasiakkaat nassuiaatit**

Nr. 1-imut

Allannguutissatut siunnersuutip malitsigisaanik Inatsisartut inatsisaat ulloq 1. Juli 2023 atuukkunnaarsinneqassaaq.